

vne damoiselle d'excellente beaulté danser en vn bal, en fut incontinent transporté et rauy si loing hors de soy mesme, que oncques puis il ne se trouua en ceruelle, et lui rongea ceste pensee le cœur si auant, qu'il se tourna en toutes les especes qu'il peut, pour paruenir à ce qu'il prétendoit. Mais parce que la damoiselle estoit sage et chaste, et au reste de grande maison, et regardée de tant d'yeulx, et enuironnée de tant de gardes, que le galand se trouuoit bien loing de son compte, dont luy croissoit l'amour, d'autant que son desseing touchoit plus à l'impossible, de maniere que de fol deuint enragé, et se donna tout en proie au diable par l'instigation duquel il s'acoste d'un fameux necromantien (qui deia auoit fait en celle ville d'Italie des experiences de prodigieux effectz) et l'importuna tant par argent que par prieres, qu'il tira de luy une promesse de moyenner ce qu'il pretendait, mais la promesse estoit difficile à faire, comme les promesses du diable ont tousiours vne queüe, car le magicien luy dit : Seigneur, retirés vous en vostre logis, et demain matin sur les quatre heures, la dame ne fault d'aller hurer à l'huy de vostre chambre : mais sur tant que vous aimés vostre vie, de la dame et de moy, gardés vous bien de vous endormir à telle heure, car si vous vous oubliez de tant, asseurés-vous que la dame mourra à votre huys sans appel, remede, ny remission, car le sort le porte ainsi. Le gentilhomme dict qu'il se garderoit bien de tel inconuenient, et que martel qu'il auoit en teste l'empescheroit bien de dormir ; lendemain ne faillit la damoiselle charmee d'aller hurer à l'huy de la chambre du gentilhomme. Mais de malheur il aduint comme le necromantien auoit predict, car s'estant endormy ce ieune homme, la fille tomba soudainement toute roide morte à l'huy de la chambre ; luy enfin s'estant esueillé, courut à l'huy de sa chambre où il voit ce corps mort, et ne fault point demander quel estoit, ou plus marry, ou plus estonné, ou plus perplex et esperdu. Car il ne scauoit que ce corps pourroit deuenir, et ne peut mieulx faire que de